

## Putardi debata ano Delčevo

Ko 25<sup>to</sup> oktobar 2008 b. ano Delčevo sine ikerdi i putardi debata ki tema „ O hali e minoritetengere etnikane khedipangoro ano regiono ko Delčevo, Makedonska Kamenica, Pehčevo, Berovo, Vinica thaj Kočani” savi so sine jekhto ani seria putarde debate anglodikhle ano proekto. Resarin e debatakere sin te vazdel diskusia maškar e prezententoja tari centralnikani thaj lokalnikani radži, e biradžikane organizacie thaj e dizutne baše trubutnipa e minoritetengere etnikane khedipangoro ani sakoja tare šov komune. Ki debata lele than sa ko sa 48 participanteja, maškar savende sine 29 prezententoja tare biradžikane organizacie, 15 prezententoja tare institucie thaj 4 žurnalistoja tare komune Delčevo, Makedonska Kamenica, Pehčevo, Berovo, Vinica thaj Kočani.

Moderatoro ki akaja putardi debata sine o Toni Stoimenovski taro Regionalnikano centro bašo autoriziripe Delčevo. Ko starto e debatakoru xulipaskoro vakeripe dži e participanteja sine e Anifa Demirovska, Lenče Bajkova, Kirčo Ivanov, Zekir Abdulov thaj Žaklina Paunovska-Angdjelković.

Anifa Demirovska, direktori ko Ulvado ofiso bašo anglipe thaj barjovipe e sikljovipaskoro e etnikane khedipangoro, vakerda kaj o sikljovipe dikhela sar prioriteto so ka del dumo te ovel činavdo o sindžiri e čororipaskoro savo so si ke nesave khedipa, a majbut ki romani. Lenče Bajkova, prezentento taro Ministeripe bašo transporto thaj relacie, vakerda baši Strategia bašo kheripe ane pervazia e Dekadakoro baši inkluzia e romengiri thaj denda akcento kaj trubul e biradžikane organizacie thaj i lokalnikani korkoriradžin jekhethane te keren buti ke konkretikane proektoja, a majbut ane romane kupatnja save so nane urbanizirime. O Kirčo Ivanov, prezidento ko Konsilo e komunakoro Delčevo, ano peskoro vakeripe čhivda akcento ke rezultatoja taro jekhethano butikeripe e komunakoro Delčevo e HDZR-asa „Kham” thaj e realizirime proektoja ani kupatni savate isi majbut romani populacia bašo cidipe e bilače deponiengoro, keripe kanalizaciakiri sistema, renoviripe e thanengoro save so si kotor e fundavne školengoro thaj aver. O Zekir Abdulov prezidento ko HDZR „Kham” taro Delčevo, vakerda bašo hali e romane populaciakoro ano Delčevo. Sar so vakerela vov, i romani populacia si ke margine bizo te ovel dikhlo isi manipulacie ja na e strategiasa. I Žaklina Paunovska-Angdjelković, prezidentka ko KD „Ednakvi za site” taro Kočani vakerda baši situacia e romane thaj e turkikane khedinakiri ano Kočani, o tikno autoriziripe minoritetnikane etnikane khedipangoro ane institucie thaj i diskriminacia.

Taro vakerdipe e manušengoro save so sine vakerutne akale debatate thaj pala adava i diskusia savi so sine ekrdi iklile akale phandle lafia thaj rekomendacie: te ovel pošukar o digri e sikljovipaskoro kori e Roma (stipendie, akharipe thaj leipe than e daj/dadengoro Roma ane školakere konsiloja, pošukar keripe e relaceingoro mentoro-sikljovno, iniciativa bašo bahan proekto bašo agordipe e maškarutne školakoro lovenca taro Romano edukativnikano fondo), e biradžikane organizacie te keren lobiripe ke jekhina tari lokalnikani korkoriradžin (proekto bašo keripe bareder buti ki infrastruktura ki romani khedin), e prezentetntoja tare etnikane khedipa pobuter te oven autorizirime ane institucie, te ikeren pobuter asavke ja pale paše asavkengere bešipa e prezententonca tare verver ministeripa thaj institucie, kote so putarde ka ikljoven e problemoj thaj ka ovel avipe dži e solucie bašo lengoro nakhavipe.

I Fondacia Instituto putardo amalipe- Makedonia kerda implementacia ki putardi debata ano jekhethano butikeripe e Regionalnikane centrosa bašo autoriziripe Delčevo (anglederutno Centro bašo dendo dumo ko BRO Delčevo). Sar rezultato tare diskusie ke putarde debate o Romano kulturakoro thaj edukaciakoro centro „Ternipe MK” taro Delčevo vazdinda proekto anavesa „Roma diplomenca” saveske sine xramome phandlo lafi e Romane edukativnikane fondosa te šaj 50 Roma taro Delčevo, thaj Berovo te agorkeren o maškarutno sikljovipe. O proekto ka ovel kerdo ano jekhethano butikeripe e komunasa Delčevo.